


PARTURENA PESTA PARNINGOTAN HAMAMATE NI TUHAN JESUS KRISTUS

📖 Ev : Heber 10 : 16 - 25

📖 Ep : Psalmen 22 : 1 - 6

**TOPIK : DIBUNGKA JESUS DO DI HITA DALAN NA IMBARU JALA
NA MANGOLU**



Jumat, 29 Maret 2024

DI

**HKBP – HURIA KRISTEN BATAK PROTESTAN
BERINGIN INDAH**

01. PANGARADEON

1. Borhat ma sude parhalado – Prosesi sian Bilut Parhobasan – Konsistori – dung jolo martangiang.
2. Tingki Prosesi Parhalado, Laos mangkuling organ sian BE No 449
3. Martangiang Na hohom dibagasan roha, mangauhon Panghophop ni Tuhan Jesus.

02. JOUJOU TU PARSAORAN

L : Huria ni Tuhanta ! Na marpungu do hita di joro ni Debata sadari on, mangoloi dohot mandapothon joujou sian silang ni Tuhan i. Na joujou do Tuhanta Jesus Kristus sian hau pinarsilang, manjou ahu dohot ho, manjou saluhutna bangso di na dao nang na jonok pe. Bege ma panjouNa i (*hohom sangombas*).... lambokna i soaraNa i, mansai lambok di sipareon, manusuk tu pusupusu. Soara ni anggukangguk do i nian, ala ni bernit ni sitaonon. Alai boasa tung lambok begeon? Boasa tung uli di sipareon? Amang tahe...! Ndang manorui soaraNa, ndang mangaleai pandokNa, tung manait roha do, manait roha ni saluhut sipareon na umbegesa. Ala ni aha do i ? Ala ni holong ni rohaNa na so hadodoan do i. Asa taruli haluaon dohot hangoluan angka pardosa di sude partingkian. Ala ni i angka dongan...! Nunga tadapothon Ibana na manjou hita di pungan sadari on, antong, alusi ma joujouNa i, joujou ni Jesus Tuhanta i sian Silang ni Kristus i.

H : (***mangendehon*** BE. No. 719 : 1 “Hubege soaraM O Jesus”)

Hubege soaraM O Jesus, hubege soaraM O Jesus. Hubege soaraM O Jesus na manjouhon ihuthon ma Au. Togu au Jesus Tuhanhu, iringiring ma langkangku. Patuduhon ma dalanMu, asa unang, unang lilu au.

L : Ida ma. Ibana na gantung di hau silang i, mangalehon hangoluantu dohot hasesaan ni dosanta. Marhitehite pungan na marningot panghophopon ni Tuhan i, ima tapaingotingot tongtong di ngolu siapari. Uhirhon bagas tu roham Amang, Inang, nang angka Naposobulung pe, naung sesa dosam, digarari Jesus Tuhanta i.

H : ***Tompa ma roha na ias dibagasan ahu, ale Debata jala paimbaru ma tondi na marsihohot dibagasan ahu.***

L : Tapahohom ma rohanta, tapaserep jala tapaunduk ma rohanta di toru ni silang ni Tuhanta i, marende ma hita !

03. MARENDE BE. 449 : 1 - 3 " Sai Solhot tu SilangMi "

Sai solhot tu silangMi, Jesus ingananku mual na mabaor disi, ima inumonku. Silangmi, Tuhanki ima pujionku, paima sogot sahat au, I endehononku

Lao ma au tu silangmi, I haporusanku. Sai asi ma rohami, unang tulak ahu. Silanmi, Tuhanki ima pujionku, paima sogot sahat au, I endehononku. – organ ... jongjong – Domu ma tu silangmi, I ma tioponku, asa unang lilu au. Ho ihuthononku. Silangmi, Tuhanki ima pujionku, paima sogot sahat au, I endehononku.

04. VOTUM – INTORITUS - TANGIANG

L : Marhitehite Goar ni Debata Ama dohot Goar ni AnakNa Tuhan Jesus Kristus dohot Goar ni Tondi Parbadia, na tumompa langit dohot tano on. Amen. Sintua ni malim sisongoni do tama di hita, na badia, na so jahat, na so marlindang,

H : *Na so marbolat sian angka pardosa, naung gabe tumimbo sian angka banua ginjang.*

L : Na so pola ganup ari songon angka sintua ni malim i mamboan jumolo pelean taringot tu angka dosana sandiri, dung i taringot tu dosa ni natorop i, ai sahali do i diulahon, di na mamelehon diriNa Ibana. Haleluya.

H : *(mangendehon) Haleluya, Haleluya, Haleluya.*

L : Martangiang ma hita! Ale Amanami jala Debatanami ! Parasiroha na sumurung do Ho di sude jolma manisias. Nunga dilehon Ho AnakMu, Tuhan Jesus Kristus Tuhannami, manaon haleaon dohot siak ni bagi, pola mate tarsilang, asa malua hami sian gomgoman ni sibolis. Sai parrohai ma hami mamingkiri panaonon ni AnakMi, asa maruli hami marhite sian i di hasesaan ni dosa dohot di haluaon sian hamatean paduahalihon, asa dapot hami hangoluan salelenglelengna marhitehite Tuhan Jesus Kristus Tuhannami, Anak haholongan ni rohaM. Amen. **Hundul**

05. MARENDE BE.76 : 1, 2 " Sada nama sangkap "

Sada nama sangkap ni rohangku di sandok portibi on. Nandang tagamon na so las rohangku molo jumpang au inon. Naeng ma sai ingoton ni rohangku na binaen ni Jesus tu tondingku. Uju pinorsanNa i saluhutna dosangki.

Ingkon sai Ibana ingotonhu uju na tarpajal i. Tu hau pinarsilang ginantunghon, sai mabaor mudarNa i. Ai humophop au ditaon uasNa, asa dohot au muse upaNa; ai ditatap di au on, di pandokNa: "Nunga sun".

06. P A T I K

L : Tatangihon ma Patik ni Debata, i ma na tarsurat di **2 Korint 4: 10**, songon on ma didok disi: ““Tongtong do hupausungusung hami di dagingnami hamamate ni Jesus, asa patar di dagingnami nang hangongolu ni Jesus”. Ido sahatna. Antong rap mangido gogo ma hita sian Debata laho mangulahon PatikNai

H : *Ale Tuhan Debata sai pargogoi ma hami mangulahon na hombar tu patikMi. Amen.*

07. MARENDE BE. 88 : 1 – 2 " Di Surgo do Alealenta "

Jesuku naung manobus ahu, sai naeng haholonganhu Ho, Tu dolok Golgata Ho laho nionjar ni holongMu do, Hupuji nasa asiMi alai gumodang holongMi.

j o n g j o n g

Tarsolsolbagi do rohangku paidaida dangolMi, Marningot sasude dosangku, ai i do na tinaonMi, Hupuji nasa asiMi alai gumodang holongMi.

08. MANOPOTI DOSA

L : Hamuna angka dongan ! Tapaunduk ma rohanta. Tapaidaida ma Tuhanta na targantung di silang i.... (*hohom sangombas*) Ida ma. Hansitna i dihilala, alai dipataontaon do saluhutna. Targantung ma di silang na so marsala, na so marpipot. Na sangap sian banua ginjaang, hatongamon do tumpalNa, alai sap mudar do sian simanjungung sahat tu simanjojak....oh...dangolna i tahe... (*hohom sangombas*) Dokdokna i dosa ni portibi on diusung Ibana tu parsilang i. Dosangku, dosam, dosanta, dosa ni portibi on. Tagamon dope ulaning mulak tarsilang Tuhan i ala ni pangalahongku ? Ala ni hajahatonku ? Ingkon pangarimangion on do tubu di rohanta ganup. Ala ni i, tingki na hohom on, sulingkit ma roham dohot angka pambahenanmu na mambahen lam dokdok silang ni Tuhan i...

H : ***Mangendehon Angonangon BE.No. 86 : 1 “ Silang na badia i “***
Silang na badia i, Ho do lombulombungki, Maralohon dosa i dohot pandeleaon i. Di sude sitaononki, Ho ma lombulombungki.

L : Ale Tuhan Jesus, nda ahu do nian gantung di silang i ? Nda ingkon hami do marutang hosa ala ni pangalaosionnami ? Boasa ingkon Ho ? Boasa ? O Jesus, Tuhanku parholong roha. Lam gomal ma di rohangku, na so lomo rohaM mida hamatean ni parjahat, alai hamubaon ni rohana do dihalomohon rohaM. Asi ma rohaM di hami pardosa on. Urupi ma hami asa lam huradoti hami lomo ni rohaM. Rongkom ma tu rohanami saluhut pambahenanMu dohot bagas ni holongMu. Ai gabe Ho do singkat nami tu hamatean asa malua hami jala dapotan hangoluan si salelenglelengna. Ale Tuhan, sai marpamuati ma rohaM mida pardosaonnami.... ! Tangihon ma Tuhan tangiang pangidoannami on. Mangkuling ma Ho Tuhan, pasahat ma tu hami hasesaan ni dosanami. Ho do na patupahon hasesaan ni dosa di hami halak na dangol on marhitehite Anak haholongan ni rohaM. Sai asi ma rohaM di hami, angka na mangarsakhon dosanami. Sai sahapi ma tu bagasan rohanami hasesaan ni dosanami i.

SL: (Mangendehon) BE. 686 : 1 “Ramun do au”

Ramun do au di joloMi, gok dosangki urasi au. O. Jesus birubiru i, dison do au patau ma au.

H : *O Tuhan, tung ala ni hajahatonku dohot pangalahongku ingkon ahaponMu na hansit. O Tuhan Jesus, birubiru ni Debata. Asi ma rohaM sesa ma dosanami.*

L : *Lehon ma tu hami TondiM na badia i, asa unang ganggu rohanami di asi ni rohaM, alai asa hot rohanami marhaporseaon laho manggotaphon nasa dosa dohot roha portibi on, asa hupasahat hami dirinami tu Ho, gabe pelean na mangolu jala na badia marhitehite Tuhan Jesus Kristus Tuhannami. Amen.*

H : (Mangendehon) BE. 686 : 3 “Ramun do au”

Ala denggan ni basaMi, ro au tu Ho, O, Jesuski. Parbadi ai ma rohangki, dison do au patau ma au.

L : *Tabege ma hata bagabaga taringot tu hasesaan ni dosa! Songon on do Hata ni Tuhan Jahowa: Nunga pola hupasisi pangalaosim songon ombun, jala songon ombun manorop angka dosam. Sai mulak ma ho tu Ahu, ai Ahu do Sipalua ho. **Hasangapon ma di Debata na di ginjang!***

H : Amen

h u n d u l

09. MARENDE BE. 86 : 2 - 3 "Silang na badia i"

Nasa na huulai, ndang tau hasonanganki. Nang ringkot pe rohangki, pola ro nang ilungki, holan asi ni roham, pangurupi, o Tuhan.

Ro do au nuaeng tu Ho, sai palambas ma rohaM. Nunga pola mate Ho, ala asi ni rohaM. Jangkon au na dangol on, sai ulosi tondingkon.

10. MANJAH EPISTEL : PSALMEN 22 : 1 - 6

L : *Epistel di hita sadari on tarsurat di Psalmen 22 : 1 – 6, songon on ma hatana: Ende sian si Daud. Ale Debatangku, Debatangku! Boasa tung tadingkononmu ahu? Sai mandaodao do angka hata ni anggukkon sian hatuaonku.*

H : *Ale Debatangku, sai joujou do ahu arian, alai ndang mangalusi Ho, jala borngin pe ndang jumpang ahu hasonangan.*

L : *Alai nabadia do anggo Ho, marhabangsahon angka pujipujian ni Israel.*

H : *Marhaposan tu Ho do angka ompunami, pos do rohanasida, jadi dipalua Ho do nasida.*

L : *Tu Ho do nasida manganguhi, jadi malua ma nasida, marhaposan tu Ho do nasida, jadi ndang tarurak. I do sahatna. Martua do angka na tumangihon Hata ni Debata jala na umpeopsa. Amen.*

11. MARENDE BE. 622 : 1-2 "Mansai Nalnai DiangKa Partingkian"

Mansai nalnai di angka partingkian, sinondang ni silangMu Tuhanki, Sian hatiuron na marsinondang, holongNa na so halampoan i, Sude na bangso do marpanghirimon, tu sondang ni asi ni roha i, Songon parluga na manghalungunhon, parbinsar ni mata ni ari i.

SilangMu Kristus tanda ni holongMu, pahisar tondi na magopu i, Mangalononghon sasude dosangku, mabaor tu laut asi ni rohaMi. Naung tubu hami gabe na imbaru, na ni urasan sian dosa i, Ala mudarMu na ni usehonMu, di Golgota di hamamateMi.

j o n g j o n g

12. MANGHATINDANGKON HAPORSEAON

L : Tahatindangkon ma haporseaonta i, songon na hinatindangkon ni donganta sahaporseaon di sandok portibi on. Rap ma hita mandok :

H : Ahu porsea di Debata Jahowa, ...dst.

h u n d u l

13. SUNGGULSUNGGUL – TANGIANG PANGONDIANON

14. MARENDE BE.84 : 1.. "Aut na ginorga tu rohangku"

(Pelea I a + I b)

Aut na ginorga tu rohangku bohiM di na lao mate Ho! Aut na huingot, o Tuhanku, tongtong panghonghopMi di au! Ai Ho do paluahon ahu, dosangku do pinorsanMi; Didaoni Ho parsahitonku; Martua au binahen nii!

~~ O r g a n ~~

Sai jalo m'au, ale Tuhanku, baen upa ni na tinaonMi; Sai naeng ingoton ni rohangku tung sasude na binaenMi; Humophop au pardosa godang dibahen holong ni rohaM; Hinorhon ni tarbaen au sonang lao mandapothon banuaM.

~~ O r g a n ~~

Mauliate ma rohangku di Ho, O Jesus Tuhanki! Ho naeng tongtong haholonganku marningot denggan basaM i. Antong, sai tiop ma tanganku manogu au tu lambungMi; Dijalo Ho do tangiangku; Sai pos do rohangki disi.

~~ O r g a n ~~

15. J A M I T A : Heber 10 : 16 - 25.

16. MARENDE BE.81 : 1.. "Aha Ma Endehononku"

(Pelean II , Sosial Huria)

Jesus mual ni ngolungku, Sipangolu tondingki. Ai dibunu Ho musungku, ima hamatean i. Ho manaoni hamagoan, patupahon hangoluan, Alani hupuji Ho, tung marribu hali do.

Haleaon, insakhinsak, reherehe, tijur pe, Tali dohot pastappastap, tung ditaonhon Ho sude, Paluahon au na pogos, sian tangan ni sibolis, Alani hupuji Ho, tung marribu hali do.

~~ **O r g a n** ~~

Bugang sada tanggurungmu di na hona linsing I, Hamamalum ni bugangku na di rohangki do i, Ho do gabe binuraan au dapotan hangoluan, Ala ni hupuji Ho tung marribu hali do.

Sungsang duri ditumpalhon panginsahi I tu Ho. Jala tolong dilibashon tu ulum, pasiak Ho. I ditaonhon Ho, Tuhanku, Alani hajungkatonku. Alani hupuji Ho tung marribu hali do~

~ **O r g a n** ~~

Tung tanganmu dohot patmu ditorusi labang i. Jadi tiris ma mudarmu sian hau parsilang i. I do mual paridian di au jolma na hansitan. Alani hupuji Ho tung marribu hali do

Sai pinuji ma Goarmu alani na bernit i. Dohot alani mudarmu Jesus na nilehonmi. Lao pasaehon dosanami, asa unang mago hami. Ho hupuji alani salelenglelengnai

(Jongjong)

17. Tangiang Pelean - Tangiang Simpul Jamita - Tangiang Ale Amanami – Pasupasu

A M E N A M E N A M E N

☸☸☸☸☸☸☸☸☸☸

Taingot jala tadohoti ma:

1. Parpunguan Na hohom, sadari on, masuk Pukul **14.00 WIB (jam 2 arian)**.
2. Partangiangan Buhabuha Ijuk, Minggu, 31 Maret 2024, masuk Pukul 05.00 WIB.
3. Pesta Paskah Parjolo, Minggu, 31 Maret 2024
 - Ibadah Pagi masuk pukul 09.00
 - Ibadah Siang masuk pukul 11.00
 - Ibadah Sore masuk pukul 17.00
4. Pesta Paskah Paduahon, Senen, 01 April 2024
 - Ibadah Pagi masuk pukul 10.00 (Bahasa Batak)
 - Ibadah Sore masuk pukul 17.00 (Bahasa Indonesia)